


志

馬鞍山志有序



吳中山水清曠阜原夷衍而馬鞍山獨秀拔平
疇千仞屹立堪輿家云山海之氣皆融結于此
信江南佳麗地也登紫巖則南眺三江左顧滄
海北引虞山西挹郡城諸峯蒼翠掩靄四面環
合其岡巒蜿蜒林竹峭蒨奚翅若蓬丘瀛隄城
中闌闔囂煩北行千武便抵山麓蕭蕭生餐霞
馭風之想予于山之東南夙構別業築垣樹楫

植以松竹梅桐積之三十年皆敷蔭成林每芳
辰嘉侶嘯詠其間不知頽景之將侵可以酬雅
况荅清音矣或曰子生于斯長于斯遊息于斯
子忘山乎山忘子乎意者此山之靈將有望于
子耶予諱其言作馬鞍山志山中景凡二十咸
附于篇

紫雲巖

巖峙山之西南叙云千仞屹立即此也翹翹紫
翠秀石千層若刻若疊予行四方閱山水多矣

每婁門返棹遥睇斯巖便秀色攬結神情蕭遠
俗呼為大額厥名不與今易為紫雲巖僉以其
上干雲霄紫氣飄徊閭闔可通矣緬思吾邑人
才有唐宰相張公鎰後代生偉人宋有文節衛
公涇王文恭公絢待御樂菴李公衡 國朝文
莊葉公盛禮書文簡毛公澄冢宰恭靖朱公希
周太常卿恭簡魏公校大學士文康顧公鼎臣
皆一代儒英千秋彥碩其他俊乂不克殫書雖
三江襟帶萬水縈紆鍾奇孕秀篤生群才而茲

巖之靈瓌默侑斯民要亦不可誣者

碧玉泉

泉在山東南麓幽穴潛通不聳膚沸而靜吐不
澈泠泠若珠寒瑩若玉今入小園中予得而有
之爰構忘歸亭于其上其下導以芳池丹蓉抽
華絲柳搖翠點暎可愛而北巒林影入我簾牖
沈隱侯云遇可忘懷處此其近之矣

郎官栢

成化間縣令羅侯某以山枕城市樵蘇日繁植

栢千株未逮成林而斧斤入焉牛羊牧焉久已
濯濯無餘止存一碑紀其事于山中耳

狀元松

松乃顧文康公手植公未第時鬱有大志慨然
買松栽若干萬徧植巖谷今山陽石多土少皆
不立而其陰則喬柯隆幹踈影清陰宛然山林
保障當時人或謂之公笑曰吾以茲山之童而
有斯植焉非利之也弘治乙丑公舉進士第一
人遂名爲狀元松云今聞有樵爲薪者嗟乎公

之厚庇斯邑意亦勤矣尚念之哉

鳳皇石

石在山之坳巍然壁立覆以長松下有豐草然不知其名何始也

燕子溪

溪從山溪橋北流而南澄灣西轉類燕尾橫斜而青陽溪館適臨其前予詩近山皆映戶曲水正當門紀其實也

凌霄塔

塔在山之塚百里樓前弘治間爲雷火所焚今猶屹竦上摩青霄也

卧雲閣

閣惟三楹而東據紫雲巖之勝憑闌寓目城中萬井樓臺烟樹咸效于睫其下柳渚禾疇青蒼暝帶或孤烟飛引逝鳥翩翩頰而玩之忘夫日之夕矣唐孟東野入山賦詩三章今刻于楹間

春風亭

孤亭四柱危倚紫雲之巔邑先達太常卿夏公

泉懸車時建來歌者咸集焉

玲瓏石室

語曰篆刻彫鏤木之災也予於茲石亦云自山有是石而索之者衆山側之民晝夜潛屋竊取以徼利前輩顧文康公嘗白之有司嚴爲厲禁而愚民罔知餘風未殄亦緣上以意求下以機石之巧也而溝夫人之巧也故石之災於是始矣老云膏以明自焚蘭以芳自摧均斯歎矣舊有玲瓏石室三楹傾廢已久而室尚存予傷夫土脉之日漓也山氣之日削也故備書之以爲觀風者告焉

青陽溪館

東園創於嘉靖初元門扁青陽溪館乃太子校書王君繩武隸書其中有薔薇屏荼蘼徑桐榭松坪梅林杏圃有牡丹芍藥欄有雲東草堂柱帖琴書全雅道水木湛清華旁幃城中車馬何人到水曲風烟竟日留左室帖山中皆可悅松下亦忘言右室帖不妨佳句頻題竹况有清樽

共對花其東有碧玉泉有忘歸亭其西有竹園有篔簹竹居凡園林宇舍皆泉兒營構以供娛侍之樂昔王右丞摩詰家于終南自矜其輞川之美日與裴迪崔昌宗諸人仗景均賦允可繼騷人之逸響然濡迹叛廷幾不能免予乃驛組清時栖遲霞石優游未憊之身安集維桑之里顧大道無聞名位弗稱不其幸歟

桃源洞

洞在馬鞍山陽累石爲之積久傾圯中亦蕪穢遊客之所不入上有翠微閣

桃花塢

郡城有桃花塢舊矣茲山之民凡負城面山而居者家植露桃風柳于芳堤流水之間每春時桃華盡吐繁若蒸霞而高人狎客往往携壺藉草以取適焉故名桃花塢

翠微閣

閣在山腰登其上者憑闌南眺則郊原城市之烟景皆集于几席間語云近有翠微上有卧雲

雖高下不同其勝一也

文筆峯

峯在翠微之東小塔之西志云宋某年魁星見于此峯文節衛公遂大魁天下

百里樓

樓在山最高頂登則滄溟震澤三江九峯或於烟靄中見之

三茆宮

宮創于嘉靖某年以祀三茆真君金陵地肺有

三茆殿茲則其行宮也

武陵源

武陵源乃文康公曾孫咸和所構扁曰武陵源邑士俞君允文書其中欄檻宛曲花竹娟美長松古樹被以溪巒觀宇幽軒隱映左右究東巖之勝焉與青陽溪館接垣聯纒予美贈朱山人云相近竹參差相過人不知殆爲今時發也

玉泉井

井在山之脊深可十尋而乏泉液或構魁星閣

以臨其上

銘

楊菴銘

有序

弘齋先生易其坐名爲惕移書木涇子曰夫入
之老也猶日之嚮晦也易曰夕惕若夕而旦焉
天道之不已也夕而惕焉君子之自強不息也
予其敢忘惕乎子其爲我作惕菴銘銘曰

於穆文王厥心翼翼曰旦曰明憲天之則惟旦
肯構冥契心畫陽爻效辭晝輒夕惕師文之純
窮日之力坐以待興寢不安席嗟氓蚩蚩匪慎

匪慄日晝牯亡日入作慝甘酒嗜音闌夜湛溺
晏安醜毒牀第蟲賊靜言思之其敢暇逸有美
君子宜義孔晰曰人髮荒猶日之暎荏苒頽陽
虞淵載入入曰明夷明不可息人壽幾何若旦
若夕瞬息匪懈自昭厥德我車既攻我馬既飭
載約其綦載收其憤既謹斤斤亦戒默默先訓
明清佩服無數惟一斯純惟靜斯一一者無欲
詎曰無適自我聰明母亂母汨天衷斯標允協
皇極

碑

南海劉節婦墓碣

吾聞之谷有霜幽蘭不輟其芬工有鬢白璧弗
渝其素物維然也而况人乎此菴嫠志婦所以
自靖自獻于通心而彫瘁荼苦超然獨復迺今
知非詩書禮樂之所及化也夫若是者固以有
恒性焉詩詠秉彝言乎有則也此風若流日靡
月浸橫潰蕩決幾何不淪于九仞之淵哉是故
貞女共忠士結偶奔婦將亂臣成匹無乃觀其

類也乎粵稽篇牘有化石崩城淪波投壑斷髮
絕鼻雉經狐首厥道不一然皆仁甘蕙折義謝
艾榮其積誠爲精者歟何翩翩也先民論婦烈
不如貞矣貞也者從容服義之謂也吁嗟艱哉
吾觀南海劉節婦孝諸嚴姑順章妯娌二十移
所天越五年天者天提負眇孤道安終始幽蘭
白壁何以加焉自非心緼詩書生知禮樂疇能
憤激以積誠從容以服義皜然而不滓者也非
節歟于是其孫地官主事李君憲譔考其世躋

門稱曰自吾父載生以迄于吾有子若孫皆吾
祖母荼蓼之遺而寵章未逮我心惟盡子胡不
叙而明之李君歷仕揚聲苾芳郎署德陰報陽
夫亦既昭昭也今主上孝理天下仁義之道
風翔電激顧今未之請爾而又奚悲邪惟余感
李之孝高劉之節懸合乎母孫二人之義敢綴
蕪辭闡繹光烈俾刻墓門以詔來胤貽範亡極

徵士周君墓碣銘

徵士諱鉞蒙化戍籍其先安仁人也七世祖孟
嘗始戍蒙化生均用均用四胤伯聰仲清清從
征麓川陞百戶聰五胤晏其稗也晏生鉞滇世
胄之家亡高貲乃百戶祿亡何矣其窶宜也晏
祔屬勞遠窶益宜也故徵士繼家越在蓬藿壤
垣席門僅蔽風雨然雅尚儉素服勤苦偕其配
劉拮据捋蓄稍樹生業置田一項於南河之濱
曰是田确者力耕之足自養幸不爲勢家奪矣

且約其子大純大綬釋甲而耕大繡釋耕而文
繡奉約唯謹績學累行亦既蔚然敷彩藝林矣
嘉靖壬子子試場屋巡察西野黃君悅其理藻嘆
曰美哉洋洋繡之文乎惜哉其邁疾也使獲跋
亨其冠群儁乎繡歸掩泣不忍伏膝下申詞又
亦感傷其意焉越明年癸丑五月廿有二日徵
士以疾卒享年七十有三予聞召有司聘繡於
青華館正諸生三返始至察其意魄纍纍若初
飯含時也士哀而敬焉俊乃曰庶哉蒙郡之多

賢也往年予計偕 京師解后官子直於廬龍
道中比予祗役巴蜀相與周旋久也今復識范
子運吉於昆明之上云夫仕多廉未若官子若
是其潔也曾有佐鹺政垂二十稔而家計益落
窮約如寒峻者乎夫士多孝未若范子之危以
切也曾有其親轉徙他方乃徒步萬里間關數
年不避九死而竟負遺骸以歸寔者乎官范皆
蒙產也語云國無君子斯焉取斯假令今時如
古察孝廉周生非其人邪徵士子凡三人孫七

人尚象尚賓尚爵尚變尚綱尚占尚理墓在郡
址城之伏龍岡有宿草矣銘曰
士求諸野維樸維茂樸茂維何况也世胄有美
徵君抗迹林岫抗迹維何川漁田收種樹養鮮
表縣肘後其儀孔嘉德音孔究載錫康寧亦永
眉壽厥胤翩翩鸞鳴文囿蜿蜒龍岡允孚吉繇
吉繇維何徵之堂構

行狀

贈奉直大夫工部員外郎先考府君行畧
先君雅性沈淵矜量虛澈探其素積兼忘物我
廓有弘度壯歲氣凌儔伍思樹庸業嘆曰丈夫
當鴻徂鳳征鏗鏘廊廟寧能作川遊谷隱邪計
偕春官䟽上十事皆吳中及他旁郡縣利弊蓋
馳情魏闕希跡龍門者矣耽悅經史雙枝抄讀
寒暑不廢比老轉劇端午家人供角黍餠梓梓
隣硯墨先君神遊竹素捲墨瀝以啖角黍家人

徹具惟見玄瀝在口而錫獨存公初不知也其
篤志如此酷惡浮屠目不披虛蕩之章耳不聞
梵唄之音亦不鞠躬于曇摩之像嘗對客曰伯
陽清靜之教吾知之若一觀釋書使我神情愜
悅百骸四體皆欲隳蕩無所根着求之愈玄而
愈覺無用不知晉魏唐宋以來儒流英達何故
特深嗜之豈其榮盛已歷情迷更熾希未來之
福報而欲徼惠于彼胡邪求出世而未能忘世
此釋氏之心似無欲而本多欲也當世以爲名

言至性孝友念吾祖早棄祿養吾祖母王氏寡
居出贅睽隔每時祭忌辰伏地嗚咽凝沉眄睩
若冀猶獲見焉兼之宅仁流恕欽惠寒窮雖韜
迹澁泌曠然鍾鼎之量慕鄉達文正范公倣置
義莊給贍姻里擇林水佳地環建鄉校集會群
從歌咏脩息淵穎者俾之爲儒醇朴者責之爲
醫其不能者習業隴畝母事未作先君既質賦
登絀亦神慮玄暢居常酬接洞落無疑性行恪
淳昭視無隱故擢樞宗戚咸孚化而歌慕焉俊

讀史傳稱陳太丘郭有道能表正鄉閭格化民物由今視之殆不是過也姑舉其一二吾祖素多賢生六胤先君其最少者吾祖極愛之每置膝上撫弄曰此兒吾明月珠也俄吾祖病終賢皆爲長胤得群季有言稍欲聞諸理吾父委諭不從則謝曰若必欲請有司吾非先人子邪吾必曰先人無厚貲也諸父咸悔曰吾弟釋且能若是訟竟不果伯父亦稍以貲業頒諸弟云後吾父出贅于吳吳名族世閱入門未及十年其

嗣息稍長即引歸毫髮不私獨携一榻以出而養外姑陳三十年禮敬備至比卒猶悉力斂葬吁嗟乎今世章縫之士凌駕詞場標名雅素可
以語道矣而豆羹藜食一餅之金失得不見於
聲色者幾何人哉其視吾父蟬蛻清露之林鳳
舉紫烟之表寧不爲有負哉故雖位未崇祿不
逮而私談公許曰盛德君子必首加薦及無敢
讓焉先君雖雅志用世而霞岫雲扉寔其所好
中歲以後遙領州刀辭疾不就日惟呼挈儔侶

嘯咏溪谷以明其志焉嘉靖己卯棄諸孤俊夙
夜皇皇痛哲人之云亡愍家聲之或墜而無以
仰續先德也幸賴餘慶繫官 朝署猥承 國
恩 贈先考奉直大夫工部員外郎伏自退村
孱弱孤遺仰荷 明渥昔歲銜 命南土情非
攀栢儀舉燎黃徒曰彌文無益往者顧先君棲
魄于金竈之北阡馬鞍之西麓我文丈衡山公
實賜之銘雕諸玄石而墓碑未樹何以遐承愧
孰甚焉罪孰甚焉伏惟太史升菴先生長庚載
曜淵雲繼作文章經緯邦國制作鬱炳古今慨
然其懷俯賜玉允即當勒之貞珉俾麗牲之有
依庶幾流風將停車而太息先君子孫百世幸
甚謹狀

封太宜人母吳氏行實

太宜人吾母吳氏蘇之崑山人大父禮部主事
諱凱里人謚爲貞孝先生貞孝生三子次靜菴
公諱德配碩人陳氏實生太宜人靜菴公早卒
無子其弟河南參政公仲子南爲之後陳碩人
以吾母之貞慧而淑也曰是宜擇婿之良迺得
我奉直府君爲館甥焉未幾府君睽念我祖母
王太安人弗置乃謂吾母曰彼嗣且長矣吾與
若宜久泊於此邪遂拂衣歸田廬什器一無所

私吾母即婉然從之無難色而事吾祖母朝夕承懽甚適也未久吾祖母捐養乃復奉陳碩人同居養之餘三十年比卒力爲斂葬先是吾祖贈審理正府君遺貲未析諸父稍欲聞之理吾父秩最少獨止之諸父相與感嘆訟言迺息夫臨財薄取自昔中堅之士猶以爲難以吾父之先幾秉讓雖得之天植然非吾母順成之則闕墻之刺興矣當是時族黨内外罔不頌德焉吾父嘗置庄建塾惠養嫗戚至如調血窮困知罔

不爲以故中歲家殖凋落吾母多方以濟之靜嘿以全之不使吾父知亦不使他姓知已之乏也惟課教子孫終始嚴肅靡間涼暑一或晏起惰懈必正色曰爾業未成家聲其隕乎迨晚年春秋既高旦日猶必蚤作巡閱門牖檢錄臧獲至日暮外戶不掩則曰此盜之招也性尤惡浮屠見有持鉢者勅家人曰斯流執左道以惑人愚者昵之動溝汗馘吾身多矣其亟逐之嘉靖辛卯夏月晨興謂俊曰吾夜夢汝遊瓊州汝將

起乎明歲壬辰俊果舉進士繁官郎署侍養于
京華適 天子以 太廟成覃 恩寓內獲封
吾母爲太宜人辛丑俊擢四川按察司副使提
督學校中途謂俊曰汝父昔領州符吾勸其母
遠征嘗聞蜀道難今乃以汝故躬歷險阻其數
矣夫然湘巴山水之勝吾亦幸見焉比達省舍
偶夜之燭吾母擁衾默坐俄聞旁舍有歌而絃
者謂俊曰彼務豐沃何似我愁守官箴邪洞識
義類如此戊申俊調山東舟行抵臨清疾作

七日汗不出四月七日遂棄諸孤溯誕生之年
爲成化丙戌十一月十五日得壽八十有三嗚
呼痛哉子二復吳太醫院冠帶醫士娶陸氏復
俊山東按察司副使娶黃氏封宜人女三適登
封知縣沈淵次光祿寺署丞方策次舉人王應
宿孫三俱縣學生泉娶張氏之禎娶方氏穀贅
王氏女五適唐芳泉次府學生張迪次朱延禧
次國子生秦稼次縣學生金允成曾孫五玄擘
聘王氏玄瞻聘顧氏華國聘吳氏玄暉聘朱氏

玄暉尚幼女二字楊增魏承寵孤等卜庚戌十
二月一日啓先奉直府君之兆而合塋焉俊哀
疚之餘竊念閨閣之行非所以告人人亦猝未
易知然陰德配諸陽則中外之教一也而墓門
無銘陰教缺矣俊亦何忍吾母之芳烈終泯泯
已乎伏惟太史衡山先生於周有媿昔我先府
君築壙之石辱賜之銘則其於壺政將必有習
聞者是以痛念摧烈輒忘蕪陋拮拾一二用備

錄焉

祭文

祭大理少卿顧二江文

存順沒安於赫神理亦有善人維國之紀吁嗟
先生佩藻握芳挺姿龍鵠抗質瑤璫容量虛廓
逸才高騁樞機旁綜文明中秉蚤掇巍科出宰
英縣視篆未期逆濠構變從容樽俎談笑甲兵
鯨鯢既侈湖海肅澄獻馘策勳擢貳廷尉明慎
祥刑罔不砥畏朝疏弗協暮即引車徘徊衡館
清風穆如釋情圭組軒志雲壑俯窺澄淵仰睇

丹閣浮游象外振劃寰間心渾迹化履素乘閒
令聞孔昭屢騰薦剡拭目烟霄羽儀其儼芳訊
載途傾音奄繼竹宇輯輝蕙帳弛綴俊視學西
土粵覽德華歲律荏苒清容既遐投淚摘文敢
告尸祝神乎洋洋鑒此齋沐

祭韓侍郎母夫人文

悠悠蒼昊湛湛黃墟脩始壽髮賦受理殊緬彼
靈質胡然長往考德蘭閨冲善高朗肅夫以義
鞠幼以仁嚴邁商飈恩洽陽春昔聞鄒母勤教
孔令懿哉慈軌曠世齊運睠言喆嗣翼佐 皇
休圭璧爲姿鸞虬與游粵覽麟篇母以子貴朱
紱方隆白楊興嘒虛堂啼烏久徑飄英永懷四
德浩即九冥聞訃聿惶瞻望弗獲絮酒告虔幽
鑒匪隔

書

上高蘇門先生書

俊嘅都門奉遠恍焉如失累月未寧竊念俊才
寔下中摛文抱藝無以瘡人猥承特達之知收
寔門下煦濡扶掖靡不勤至生我知我恩何
間焉向圖脩啓稍效纖微而長安之使未聞有
過嵩洛者歲杪李太博附賜手教詩帖祇覽
不勝悵懣俊夙抱迂拙罔副隆知蓋出入天
曹者三年于茲矣曾無鴈鷺末技少裨盛世

徒抗走塵俗與衆浮湛雖家人僮隸亦厭且笑
之况踈于此者乎然俊非有雄雋之才濟時之
智少試則功報事集可指日豉也又非如古人
所苦功高不調者也顧同升之士非有所賢于
俊也而異拔焉則拔之者以爲若是乎其賢也
而人見夫賢之者又同聲責美直方吾輩不識
一丁噫嗟乎俊亦何忍以百年之身而甘置之
于下流也用是屢欲披衣長往潛晦山曲俊雖
無成頗好詩律此吾 師之所知也偃仰丘中

散髮箕踞盤礴長松脩竹之陰連我良儔撫琴
擊筑留連詩句非不足樂也崑山之陽有田二
頃膏我僅奴耕而獲焉非不足具饘粥也架有
先君遺書非不足於課子也則何必累歲栖栖
安受夫世之承辱哉私家痛鬱情事未伸先君
抱不世之志高懷至性卓行絕俗晚而仕仕而
不顯且不久俊每興思夢寐啼哭思無以明先
志雅望載淪子道莫塞罪孰甚焉故區區俊首
干辱辱而不去癯而猶振者慮固有在也不然

則如前二者之陳亦可以弗累矣而非中也太
上立德其次立名古人或遠或近或去或不去
務斯二者而已顧今落落寡耦安知時徂勢動
不有知我如公者乎故俊之蹙蹙無耻甘委於
沉沒而不悔者以此也旅事如雲豈忘深念所
幸者母而次居此皆輯幼子八歲誦詩頗慧持
是稍慰羈縻無憂歲華之晚矣外錄近作小詩
一幅上備教覽

涇林文集卷八 終

大父太僕公幼而穎異稍長即湛思執林凡左
馬屈宋家言靡不殫精旁搜究厥玄奧于詩者
陶彭澤王右丞而以李杜參之甫弱冠即與太
史前峰王公方伯雍里顧公蜚崑陽三傑之譽
時伯祖虛巖山人雅善聲律名馳吳苑居恒私
相切劘進詣愈淵以宏每有製述即折角時髦
揚聲遐邇既通籍 熙朝列在清署惟以吟嘯
篇籍自娛不奈向顯貴人作媿阿態用是顯貴

人咸不悅之三使南滇載仕西蜀翱翔棲復者
垂二十餘稔凡點蒼鷄足峨眉巫峽之崔嵬瑋
麗瀾滄昆明瞿塘錦江之灩澦澄澈罔不徘徊
登眺對景染翰而奚囊所貯亦既盈矣博南戍
史楊用修氏文富九牛雄視千古凡昭代名家
鮮所予可而晤我公于仙邨艸堂各出所製以
相訂正彌七晝夜論辯驩洽若以石投水深用
歎服稱為文園宗匠豈溢美哉用修所評定涇

林詩集嘗梓于蜀中載梓于玉邑而自謂中有
弗當意者竟再毀之晚歸婁上杜門謝客日手
一編研朱雙校諸以應酬請者一切辭弗許而
時或興至濡毫則津津數十百言不止今載在
集中可鏡也客有勸之梓以行世者輟嘿不應
蓋公志所以垂不朽者自有在故不瑣瑣于此
耳予小子臨于諸孫中最不肖讀公遺書幸弗
墜其家聲而深惜斯文之傳未廣也敬纂集而

付諸剗剔氏今寓內豈乏用修其人乎則其好
之當不啻金石也若公之忠孝清介大節則鄉
評公許自有不容掩者予小子其何敢贅焉公
以嘉靖壬辰魁禮闈嗣後大肆其力于詩文迄
今萬曆壬辰中間更一甲子而茲集始盛行于
世蓋文之顯晦似乎有定數云孫玄暉百拜稽
首謹書于卷末

